



Réponse de Monsieur le ministre de l'Économie, des PME, de l'Énergie et du Tourisme, Lex Delles, à la question parlementaire n°2269 du 30 avril 2025 de Messieurs les députés André Bauler et Luc Emering au sujet du développement du tourisme viticole et rural au Luxembourg

“A wéi engem Stadium befannen sech d'Planifikatioune vu wichtege Projeten ewéi dem Wäinhaus zu Ehnen oder der „Maison du vin et des produits régionaux“ zu Bréissel?

Ginn et scho konkret Iddi'e wei een d'Verfügbarkeet vun Iwwernuechtungsméiglechkeeten am ländleche Raum gestalte kann? Sinn am Kader vun dëse Projeten och Partnerschaften mat privaten Acteuren virgesinn?

Sinn finanziell Ënnerstützungsmoossname fir ländlech Betriber oder Privatleit, déi Iwwernuechtungsméiglechkeeten ubidden, geplangt? Sinn, zu dësem Zäitpunkt, scho Projeten ofgeschloss?

Oenotourismus

Am Kader vun der Entwécklung vun Oenotourismus schafft de Wirtschaftsministère aktuell un engem Projet fir e Konzept an un engem Aktiounsplang. Bis Enn vum Joer ass deemno virgesinn e Konzept an en Aktiounsplang fir den Oenotourismus opzestellen, deen sech an déi bestoend national Tourismusstrategie integréiert.

Dëst Konzept wäert d'Roll vum Oenotourismus fir Lëtzebuerg definéieren a kloer Aktiounen duerstellen déi an deem Kontext kennen ëmgesat ginn. De Prozess fir dëst auszeschaffen ass rezent ugelaft. Eng wichteg Etapp ass den 28. Mee, wann zu Gréiwemaacher de Projet all de betroffenen Acteuren presentéiert gëtt. An de Méint dono ginn an engem partizipative Prozess mat den Acteuren vum Terrain Ziler definéiert an Aktiounen konzipéiert fir den Oenotourismus zu Lëtzebuerg z'ënnerstëtzen an z'entwéckelen. Dëse partizipative Prozess besteet aus individuelle Gespréicher a Workshope mat de verschiddenen Acteuren.

Am Kontext vum Oenotourismus kann och nach op weider Projeten an Evenementer, déi Deel si vun der Promotioun an der Entwécklung vum Oenotourismus, higewise ginn. Esou ënnerhëlt den ORT Musel Initiativen am Beräich Oenotourismus, wéi zum Beispill de *Wine Taste Enjoy* an de *Wine Lights Enjoy*. Et ginn och geféiert Touren am Beräich Wäitourismus mat Degustatiounen ugebueden.

Och d'Präsentatioun vum Guide Michelin 2025 zu Metz, déi am Partenariat mat Lëtzebuerg gemaach ginn ass, schreift sech an d'Promotioun vum Oenotourismus an. Et hunn ënnert anerem 5 Lëtzebuerger Wënzerbetriber Deel geholl an 3 Lëtzebuerger Wäiner goufe beim „Dîner des chefs“ proposéiert. An dësem gastronomesche Kontext ka schonn drop higewise ginn, datt 2026 déi nächst Expogast mam Culinary World Cup zu Lëtzebuerg stattfënnt.



Allgemeng gi bei touristeschen Evenementer, wéi dem Season-Opening op der Place d'Armes, oder op verschiddene Foiren, Lëtzebuerger Wäiner ugebueden a promouvéiert.

Bei de Projete ronderëm den Oenotourismus gëtt, esou wéi dat och aus de genannte Beispiller ervirgeet, reegelméisseg a konstruktiv mat Privatacteurs aus dem Secteur zesummege schafft.

Wäinhaus zu Éinen

Op ongeféier 1.300 m² Ausstellungsfläch, mat Degustatiounssäll a Banquetsraum, wäert d'Wäinhaus zu Éinen eng eenzegaarteg Vitrin fir den Oenotourismus, d'Region Musel an de Lëtzebuerger Wäi ginn. D'Wäinhaus setzt an Zukunft op eng nei, zum Deel interaktiv, Ausstellung, e professionellen Accueil, eng regionaler Vinothék, e Wäibistro wéi och eng Rent-a-Bike Station fir den Hub vum Lëtzebuerger Oenotourismus ze ginn.

An 3 immersive Säll wäert de Visiteur d'Miselerland, mat senger Landschaften an Awunner entdecken. Dem Visiteur sollen de Wäibau an d'Region méi no ze bruecht ginn, fir en unzereegen, no der Visite am Wäinhaus, d'Géigend weider ze entdecken. En Haaptelement vun der Programmation sinn déi thematesch Workshoppe ronderëm d'Oenologie.

D'Wäinhaus wäert dem Visiteur eng breet Palette vu Workshoppen ubidden, zum Beispill geféierter Degustatiounen an thematesch Degustatiounsatelieren. Et ass ugeduecht am Kader vun der der Vinothék mat de Vertrieber aus dem Wäibau ze kooperéieren, a bei Animatiounen a Konferenzen zesummenzeschaffen. De Site bitt Privatpersounen, Betriber an aneren Acteurs d'Méiglechkeet an de Raimlechkeete Konferenzen, Reuniounen oder verschidden Evenementer ze organiséieren.

D'Aarbechten un der Enveloppe um Gebai grad ewéi d'Bannenausbau- an Technikaarbechten sinn aktuell amgaang. Et ass virgesinn, datt all dës Aarbechte fir Ufank vum Joer 2026 ofgeschloss sinn. Wat d'Ausstellung ugeet, ass den definitiven Zenario ronderëm d'Inhalter vun der Ausstellung Enn Abréll validéiert ginn, elo preparéieren d'Bureaux d'études déi ëffentlech Ausschreiwungen. D'Aarbechte vun der Zeenografie sinn ab Januar 2026 virgesinn, am Juli 2026 ass viraussichtlech alles ofgeschloss.

Luxembourg House

Zanter 2023 ass am Stadzentrum de Buttek „Luxembourg House“, deen sech zur Missioun gemaach huet, de Lëtzebuerger Savoir-Faire a lokal Produiten ze fërderen. Hei gouf d'Zesummenaarbecht mam Institut Vini-viticole gestärkt, fir d'Promotion vun de lëtzebuergesche Wäiner a Cremanten nach weider ze verstärken.

Eng honnert Referenze vu Lëtzebuerger Wäiner a Cremante ginn dem nationale wéi och internationale Public ugebueden, an Degustatiounen an der Presenz vu Lëtzebuerger Kellereie gi reegelméisseg am Luxembourg House organiséiert. Am Sënn vun dëser dynamescher Entwécklung a konform mam Wëlle vun der Regierung, den Oenotourismus an déi regional



Produite vum Land weider z'ënnerstëtzen, wäert d'Luxembourg House am Joer 2026 op méi grouss a modern amenagéiert Raimlechkeeten am Rez-de-Chaussée vum Gebai Konrodseck plënnere. Weider Detailer ginn nach virun Enn 2025 matgedeelt.

Iwwernuechtungsméiglechkeeten am ländleche Raum

Mam „programme quinquennal d'équipement de l'infrastructure touristique“ ënnerstëtzt de Wirtschaftsministère Projekte vu Gemengen an ASBL fir nei Iwwernuechtungsméiglechkeeten ze schaffen oder bestoender ze moderniséieren an auszebauen.

Betribler déi Iwwernuechtungsméiglechkeeten ubidden an aus dem Horeca-Beräich sinn, wéi all aner Betribler, fir Bähëllef vum Wirtschaftsministère eligibel, sief et fir Investissementer vu PME, fir Projekten am Beräich Ëmweltschutz an erneierbar Energien, oder och Projekten déi ënnert Innovatioun, Entwécklung a Fuerschung falen.

Beispiller vu rezente Projekten, ofgeschloss oder an der Ëmsetzung, zum Beispill am Beräich GËten an „Glamping Tuurm/Tiermchen“¹ sinn:

- d'Gemeng Mondorf huet e Projet fir d'Konzept vum „Glamping Tuurm/Tiermchen“ ëmzesetzen;
- d'Jugendherberg zu Lëtz schafft un engem Projet mam Konzept vum „Glamping Tuurm/Tiermchen“;
- d'Kabaisercher am Minett;
- de Casinotuerm zu Éieren;
- déi al Post zu Käerch;
- d'Paschtoueschhaus zu Randschelt;
- de Gîte „Beim Mulles“ zu Veianen (e private Projet).

De Wirtschaftsministère féiert aktuell ëmwelttechneschen Etüden duerch, fir d'Méiglechkeet vum Bau vun engem Hotel op engem staatlechen Terrain zu Lëtz an der Gemeng Esch-Sauer ze préiwen. Wann dës Etüden sech schlësseg erweisen, lancéiert de Wirtschaftsministère en Appell à Projete fir op dësem Site en nohaltegen Hotel-Projet ze realiséieren an ze bedreiwen.

Luxembourg, le 27/05/2025

Le Ministre de l'Économie, des PME,
de l'Énergie et du Tourisme,

(s.) Lex Delles